

Innsbruck, 1706 Januar 1

Franz Nikolaus Graf von Thurn und Taxis verleiht das Postmeisteramt von Brixen an Carl Anreiter von Ziernfeld.

Ich Franz Nicolaus des Heilligen Römischen Reichs Graf von Thurn-Valsasin und Taxis etc. der Römisch Kayserlich Mäjestätt etc. Wircklicher Cammerer, Ober Österreichischer Regiments Rath vnd Obrist Hof auch General Erb-Postmaister der Ober- vnnd Vorder Österreichischen Lannden etc. Vrkunde hiemit, vnd gebe mäniglich zuuernemen. Demnach der Römisch-Kayserlich-Mäjestätt etc. allerhechste Dienste vnmbgencklich erfordern, das das Kayserliche Post-Ambt in Brixen mit leifigerer *Punctualitet*, als solches bis anhero von dem dortigen Postverwalter Herrn Carl zu Ofenhausen zweifls ohne Willen seines andringenden hohen Alters vnd dewegen abweichendter Cräfften versehen worden ist vnd würdt, bestellet werde. Insonderheit aber vnnd damit auch bei denen Kriegs-Leüffen durch Pusterthall nit allein abweëgs sondern auch über Brixen wegen nit genuegsamben alda anwendenden Fleiß, vnd in Ermanglung der Sprachen, dann vnnd wann nit etwo einiche verdächtige *Correspondenzen* durch*practiciert* werden khönnen. Als hab Ich als Obrist Hof, General-Erb-Postmaister der Ober- vnnd Vorder- Oesterreichischen Lannden, nach ereigneten Todtfahl des jezigen Postmeisters Herrn Carl von Ofenhausen solche Post zu Brixen (an dero rechten *Administration* vnnd nicht vmb das bloße Wile zu sehen, Iro Röm. Keyß. Meÿestätt etc. allerhechstens gelegen ist) mit einen der Sprachen khündigen vnnd tauglichen *Subjecto* zu ersēzen für höchst nöthig befundten, derowegen dann verleiche vnnd ybergibe Ich obangemerckht Brixnerische Post-Ambts-Verwaltung krafft habendten allergnedigisten Kayserlichen *Privilegii* vnnd *Diplomatum* den hierumben gehorsamist *Supplicierenden* vnnd Mir von mehrers hohen-Ohrten *recommendierten* Herrn Carl Anreiter von Ziernfeld, wegen der Ime beiwohnten *Habilitet* crafft diß, besstermassen vnnd zwar mit allen den jenigen *emolumentis conditionum* vnnd Gerechtsamben, wie solches der abweichente Herr Carl von Ofenhausen *administriert*, ihnen-gehabt vnd genossen, jedoch das er khunfftighin Mir als Obristen Hof- vnnd General-Erb-Postmeister die jehrliche *absenten recognition* jederzeit *punctual* abfihre. Also solle Er Herr Carl Anreiter nach zeitlichen Hintritt des jezigen Postmeisters zu Brixen sogleich *possess* nemmen khinnen, vnnd bei dasigen Ambt alles vorkheren was zu Befürderung Iro Röm. Keyß. Meÿst. etc. Unsers allergnedigisten Herrn vnnd Lanndtsfürsten etc. *Interesse* vnnd Nuzen des gemeinen Weesens zum Vortrēglichisten sein würdt. Welches dann hiemit vnter Meiner Hanndtschrüfft vnnd Gräflichen *Sigill* bestens *corroboriert* würdt. Ynnsprugg den Ersten Jenner Anno Sibenzechenhundert vnnd Sechse.

Fr[anz] Nic[olaus] G[raf] v[on] Thurn und Taxis m. p.

Der Römisch-Kayserlich-Mäjestätt etc. Wirckhlicher Cammerer

Ober Österreichischer Regiments Rath vnd Obrist Hof- vnd -General Erb-Postmaister der Ober vnd-Vorder Osterreichischen Landen.